

ME HYE ASE WƆ NYANKOPƆN NE DZIN MU, ƆDOMFO, MBƆBƆRHUFO NO.

Fida Nyamesemka: Ebowbira 19, 2013.

(Friday sermon – 19<sup>th</sup> April, 2013 – Fante Translation)

### **MUSLIMFO HƆN NOKWAR SU NA HƆN AHYEDZE.**

O! Hom nkorɔfo a hom agye edzi! Hom nsuro Allah de mbre ofata de hom suro No; na mma owu mmboto hom gyede ber a hom wo ahobrase mu (3:103).

Kuran ne nyiyimu yi kyere nokwar gyedzinyi ne gynabew; nokwar gyedzinyi a ohye Taqwa (tseneneeye) ne ahyehyedze nyinara ma. Se ahyehyedze yi yebɔ no tɔfa a, de mbre Kuran Krɔnkrɔn kyere no a, ɔno nye de hen adwen bɔkɔ eyiedze a Nyankopɔn wo na eyiedze nyinara adasamba wo. De mbre yebɔbɔ mbɔdzen aye ndzepa ahorow nyinara, yebɔbɔ mbɔdzen ahye Nyankopɔn Ne mbransɛm nyinara ma, de yebegye Nyankopɔn ɔnye N'akonhyefo (Nyankopɔn N'asomdwee na Ne nhyira ndwir hɔn do) hɔn nkɔnhye nyinara ato mu na yedze akɔ nyee mu. De ebekan woho de obi a egye dzi no nko nnye wo muslimnyi nnwie. Oye adze a ɔkɔ do daadaa de ibedzi Nyankopɔn Ne mbransɛm no do a afa Nkɔnhyenyi Krɔnkrɔn (NNN) no supa no. Nyia a odzi iynom nyinara do no wobotum afre no gyedzinyi nokwarfo.

Akandzifo a nna wɔwɔ Nyamesom ahorow mu no yee asobrakyew osiande woenndzi mbransɛm no a wodze maa hɔn no do; na se hen so yenndzi Taqwa do na yeyar asobrakyew ma Nyankopɔn Ne mbransɛm na hen ahyedze a, ɔno hen so wobetsea hen na wɔama owu aboto hen wo tsebea bi do a obeye de obi a ɔnntaa ndzeyeeɔpa do. Gyedzinyi nokwarfo wodɛ onya Nyamesuro na ɔtaa kyekye hwe dza obema ɔ'aye setsie ama Nyankopɔn. Ɔnam iyi do ma gyedzinyi nokwarfo ahwer wiadze yi mu egyapadze mpo a mma ommbu no adze bi. Awofɔ, anyankofɔ, ebusuafo anaade okun, yer na mba, nwomahufɔ wo Nyamesem mu ɔnye hɔn a wɔkeka ho; hɔn mu biara nnyi ho kwan de obebra obi de onnyi de ɔka Nyankopɔn Ne mbransɛm do.

Ankorankor biara noara bobu noho nkontaa wo Nyankopɔn enyim. Ebusua o! anaaso anyenkofo o! sunsum mu akadzi papa no o! Adabrabafo no o! hɔn mu biara nnkegye obiara n'adzesoadze asoa. Islam Nokwar mu no nye ebɔdwendwen Nyankopɔn Ne nsenkyeredze ho, ebegye Nkɔnhyenyi Krɔnkrɔn (NNN) no ato mu, ibeyi woho efi ndzeyee a ɔdze ɔhaw ba na edze Islam no nokwar sunsum mu ntseasee aye som no. Nyankopɔn ada no edzi de hɔn a wonnyi Taqwa no Ɔnngye hɔn Asɔr na Afɔrɔ nnto mu. Nokwar oye kwan a ɔsee hɔn. Mbom, Nyankopɔn beye Ɔtanfo ma atanfo na Nyanko ma anyenkofo ama hɔn a wodze Nyankopɔn Ne mbransɛm ye edwuma na woye ndzeyee nyinara ma Nyankopɔn enyi gye ho. Biribiara a woye ma Nyankopɔn enyi gye ho no, Nyankopɔn hyira do. Hɔn a hɔn tsir aye yie nye Muslimfo no a wɔbɔ hɔnho mbɔdzen de beebiara a owu boto hɔn no wɔwɔ tsebea a ɔkyere de woye Muslimfo anokwarfo.

De mbre yeetum agye Nkonhyenyi Kronkron (NNN) no nokwar etuhoakye osomfo no ato mu no, Ahmadiyyafo so wode wobobonho mbodzen ye dza Nyankopon enyi gye ho na woma otsim. Iyi ye hen ahyedze a osõ papaapa ara ma owõ de yedzi ho dwuma. Hadhrat Khalifatul Masih hwee so kaa, de mbre ne nsem towee faa no, n'etsiefo a nna orekasa kyere hon nye Muslim ebusuakuw nyinara, dem ntsi na obobõ dzin de nwomahufo anaa banodzifo wo Nyamesom mu no. Muslimkuw ne fã kese hwe MTA (Ahmadiyya Muslim Television) dem ntsi hon nsa kã Ahmadiyyakuw hon nsem (dawurbõ) nyinara.

Hadhrat Khailfatul Masih ne nsa kã nkrataa fi hon a wonnye Ahmadiyyafo nkyen; hon a wõhwe MTA anaaso hon a woesua Ahmadiyya ho nsem. Krataa kor a ne nsa kaã no okyerewfo no kyere de se otsie Hadhrat Khalifatul Masih ne kasae na ohwe dza orokõ do wo wiadze a nna onya awerehyemu de Mirza Ghulam Ahmad ye nokwarfo. Omaa hen atseyie na mbom onnyi ahodzen a odze bogye asetsena mu na Maulwifo no ato mu. Dem ntsi wobefa no de oye ohufo na mbom onkotum abeka Kuw (Jama'at) no ho. Obi so a onnye Ahmadiyyanyi kaa de, se hen kuw yi ye nokwar kuw dza, ono owõ de Nyankopon No mponse ho suro wo de oba ho. Hadhrat Khalifatul Masih kaã de dem nkorõfo yi wo de wokae de Nyankopon na ohye de wonka Taqwa do.

Ampaara, Ahmadiyya Kuw yi ye nokwar Kuw; dza osisi wo mfe oha eduonuanan ntamu yi ara mpo da iyi edzi. Se yehwe mbre aban horow si bõ nto a ye hen ayeyeadze, mbre Maulwifo hon Fatwa (mbra) a akenyan nkorõfo ma woye hen ewurkadze, wofa ndomum kumkum hen, hyew Ahmadiyyafo hon adan, wõpam hon fi edwuma mu, wosiw mbodoma kwan ma wonnya nwomasua ho kwan; iyinom nyinara mpo Ahmadiyyafo gyina pintsinn wo hon gyedzi mu eso woye krado de wõdze honho bobõ afõr a wõto no abaw a onnhyia, yinom ye nsenkyeredze a okyerõ Ahmadiyya no nokwardzi. Se yedze iyinom to nkyen a, Kuw yi ne kankõ rokõ do waawaa a okyerõ de Nyankopon "ye Banbõfo nwanwaso na Oboafõ nwanwaso ben a".

Ekuwekuw a wonam Islam dzin mu atsetsew a wõdze Jihad ridzi dwuma horow no dze akasakasa hen Islam mu ara kekẽ. Nyankopon si no ewur de Odze kunyimdzi ma hon a wonam Ne dzin mu dze Jihad dzi dwuma. Hwe, eben kunyimdzi na hon a wõtra hon ndzeyee do yi nya? Muslimfo rokumkum Muslimfo. Onam dem botae yi ntsi wõregyegye akodze fi obinom hõ. Syriaman mu no, ekuwekuw apaapaa hon ntamu ridzi ako ma wõdze aseredze to aman a wõwõ Anee wiadze afamu de wõmfã akodze nkõ hon mboa ma wõntu aban ngu. Muslimfo etuatsewfo na Muslimfo aban no dze dem akodze yi rokumkum honho. Ekuw ebien nyinara nnantsew Taqwa kwan mu; dem nkorõfo yi eyi honho tokyen efi Nyamesom mu koraa.

Emir Timur ye Muslim ohen bi a (1336-1405) osoeree fii akõhweabanye mu beyee ohen wo asaase yentamm bi do. Okaa de aber biara a orobotu sa no ohwehwe hu mu adze yie de Muslimfo ahemfo ye hon asomfo hon eyiedzi ma hon anaa wonnye; ana hon gyedzi si pi anaa onntse dem.se ohu de onntse dem a otu ahemfo no gu na odze Islam nhyehyee ba oman no mu. Okaa de no kunyimdzi gyina Nyankopon No mboa do. Emir Timur ne nhyehyee pii gyinaa perperye do; dem ntsi na onyaa kunyimdzi no. Mbom no so, kyere etsirmõdzen;

mbom se yedze toto ahemfo nkaa no ho dem mber no a, ono na odzi mu sen hon nyinara. Oregye ne mberewye ato mu no okaa de n'ahendzi keginaa ne perperye, nyansa na pegyaangyeddo; na ohwee n'asomfo nkunyim no do, na dem ndzeyee yi se wokye siantsir a onam do ma onyaa kunyimdzi mu du a no mu akron na oboaa no; na no mu kor per na oduaa akodzi do anaa nhye do.

Hen mber do yi, ahemfo wo honara hon pe wo hon tsir mu na wohwe hon tum a wodze si egua do no ara. Asormu banodzifo no so dze honho ahye aperdzi wo tum ho na hon mu binom atsetsew ewurkadze ekuwekuw anaade woye hon mboa. Wotsetse mbofra wo akodzi mu wo Nyamesom ntsetseebea (Madrassa) na iynom nyinara wodze ko tsia Muslimfo. Muslimnyi taa Muslimnyi no bogya do. Islam ye odo na asomdwee som, a ne nkyereasee mapa kyere asomdwee na banbo na iyi yaw akwa. Mber yi mu nkorofu dze som no akehye akasakasa mu ara ma se ewurkadze bi si wiadze yi mu a Muslimfo ekuwekuw na wodze enyi punpun hon.

Otopae totow wo USA Boston kurow mu, hon a woko tsia Islam no kaa no ntsemara de Muslimfo na wodzii dem dwuma no. Womambo kuw biara ne dzin na mbom kaã de kaa bo mu dzii dem dwuma no. Yeda Nyame ase de dem ekuwekuw no pan hon se de wonyim ewurkadze yi ho biribi, na dem nyiano yi ara mpo yie dodow. Nhwẽ, onam de wopow Taqwa ntsi, wokor do kaã de mbom wonnkã nnkua dom dwumadzi yi ho naaso wobu ho nkyidom. Eben ndzinoa na wonyae fii tu a wotui hyee hon a wonnyi banbo do? Yehwe dem ndzeyee yi n'afã so a woka de obiara nndo Nkonhyenyi Kronkron (NNN) de mbre ehon wodo no na mbom woye ndzeyee a onye dem do no bo ebira.

Ampaara de obiara a odo obi anye yie koraa no ofa no supa a oda no edzi no kumaabi na Nkonhyenyi Kronkron (NNN) kyerekyeree de mma wonndzi obi a onndzi fo wo biribiara ho, mbofraba, mbasiafo, na hon a hon enyi efifir dzem wo okober mu mpo na Kuran da no edzi pefee de, wontwetwa nngye hon a wowo nsorba nsorba bi mu. Dem dza worukumkum nkorofu wo ber a oko nsii na worema binom ridzi dzem yi e! Dawurbo krataa bi kyerewee de iynom nyinara wo gyinasi kortsee de wobokumkum Muslimfo nyinara. Binom mmpẽ de wobekyere hon adwen osiande Muslimfo ko hon mboa.

Wiadze ne Anee afamu ha dze ewurkadze ntaa nnsi ha ma iyi n'akyir yetse enyimtww, mbom ahohiahia apetse Muslim amanaman pii mu. Beye oha ne nkyekyemu eduosun na osi wo Muslim amanaman mu. Dabiara yetse ewudzifosem wo Muslim man bi mu. Pakistan, Afghanistan, Egypt, Syria, Libya, Algeria, Sudan anaa Somalia Muslimnyi ruku Muslimnyi wo beebiara na iyi ko do mpo a onnyi de woye no wo Nyamesom dzin mu na dem ewudzi ma basabasaye yi nnyi de wodze dzin Jihad to do. Muslim amanaman a ewurkadze yaayaw tsim ho no asetsena mu perperye nnyi ho koraa. Ehiafo roko ohia kokobin mu na Adzefo so roko do nya honho mbordo. Akohweaban, ekunafo, ngyanka nnya edziban papa nndzi no mpen ebien dakor, wo Saudi Arabia a onam ngo a wowo ntsi woye odzefo. Se ehwe oye de Islam dzin mu ntsi womma mbasiafo kwan ma wonnye edwuma, mbom aban no so nnhwe hon eyiedzi. Se wodze edziban biara ba a onso abaatan na hon mba. Hwe, ahenfie ne bamba noho wahyehye sika mfutuw wo ho, wo ber a amanfo no ruwu kom. Woyii no

mfonyin wɔ **television** do kyeree. Ahohiahia a ɔtse dem wowɔ Muslim aman bi so mu a aban no nnhwe ma asetsena mu perperye nnko do na ewurkadze rokɔ do ma amanba no nndzi hon ahyedze do; se woma hon kwan a iyi so ye ewurkadze. Iyinom nyinara yi Taqwa akwa. Wokã de Islam nkyerekyere esi pi, na ɔye dem so, mbom wofom ka de 'ɔyeadzeyie' anaade Messiah anaade Nkonhyenyi yennhia no mprenpire.

Ampaara Nyankopon na Ne Nkonhyenyi (NNN) hyee nkɔm de dem nyimpa no beba abeye wiadze yie. Na dza ɔrokɔ do wɔ wiadze yi rekrantse kã de Muslimfo hon werɛfir hon nkyerekyere. Asordan pii wɔ ho naaso woye ho amanye asoee. Ampaara, Kuran wɔ ho naaso woye no afefedze na nwomahufo no akyere ne nkyerease de mbre obeyie ama honara na wotwe nkorɔfo kɔ ɔsee kwan do. ɔye mfom de ebeka de onnhia de obi beba osiande Nkonhyenyi Kronkron (NNN) kaã de ɔye ehiadze de obi beba. Ampaara, ɔye ehiadze de obi fi Nyankopon ho beba abasakyer Muslimfo na wɔaka Islam ho adwenhun no ahye na ɔdze wiadze abahye Nkonhyenyi Kronkron (NNN) no ne ntamadan no ase.

Aber a Nyankopon na Nkonhyenyi Kronkron (NNN) too nyia ɔbeba no dzin de Nkonhyenyi no, woana na ɔwɔ ho kwan de ɔfa noara ne nkyerease na ɔye n'akadofo no ayeyeadze? Dza ɔrokɔ do wɔ wiadze yi dzi ho dase de Kuran Kronkron a no mudzi tse de mbre n'ahyese noara tse no, Muslimfo hon Nyamesom, hon sunsum mu mudzi na hon brapa nyinara atɔ duansuar rohwe ase ma Taqwa reyew. Muslimfo dodowara robɔ bra a ɔnnye Nyankopon Ne mbransem no nnko do. Wohia nyimpa bi wɔ dem tsebea yi mu ma ɔ'atse Islam ase mbre otwa fa na ɔatretre mu wɔ Muslimfo mu na Ahmadiyyafo de nyimpa no Nyankopon dze no bae de mbre Nkonhyenyi Kronkron (NNN) ne nkonye no a ɔhyee no wɔ mfe ɔha ntoatodo duanan (14<sup>th</sup> century) mu no tse no.

ɔnam Nyankopon N'adom na No mboa do kyerekyeree sunsum mu ahodze a ofi Kuran Kronkron no mu wɔ no mbuukuu mu na ɔkyeree soronko a ɔda nokwar na akohwi ntamu. ɔdaa Islam ne mudzi sen wiadze nsorba nsorba nyinara na ɔgyee n'atamfo taferew banyin mbomu. ɔnam Nyankopon ne tsipia na mboa do nyinee kyeree na owui gyae adzedzi ho nhyehyee a ɔbetsena ho afeboɔ (Khilafat). Sor na asaase mfoaekyir a onyae no kɔ do ara, nam atoyamkyem do da edzi. Ana asaasewosow, nsuyirii, Muslimfo honho atsetsee wɔ wiadze nhye mã de obobue Pakistanfo na Muslimfo nkaa no hon enyi? Asaasewosow a osii nansa yi wotsee nka wɔ amanaman pii mu a Indonesia ka ho. Ohia de wodwen Nyankopon Ne tumsem a oridzi dwuma ho; ohia so de wonya nnuho na woye Istaghfar (sere bonfakye fi Nyankopon ho). Hon a wofre honho nwomahufo bohunahuna wo dze, ɔwɔ de woma wuhu hon ndabraba a woreye. Ana wobotum akyere ndzeyee kor per wɔ Nkonhyenyi Kronkron (NNN) n'abrabo mu a ɔnye hon nkyerekyere yi kɔ do nde ber yi? Dza Muslimfo wode woye nye wodwen hon wu ho na woye Nyankopon N'apedze na woye dza ɔtsen ma nyimpa.

Anohoba Messiah (ANN) kasae wɔ iyi ho kaa de: ɔye me pe de kwan a Muslimfo rosom wiadze de mbre ɔwɔ de wosom Otumfo Nyankopon na wɔdze hon enyidado, hon were na ndzamba a ɔfa no wiadze ho no wɔ de wobubu no gosogoso. Na wɔdze Otumfo Nyankopon Ne keseye na No tumdzi ahye hon akoma mu na gyedzi dua no bosow aba few. Mbom, biribi a ɔtse de dua wɔ ho siesieara, eso ɔnnye dua tsen osiande wɔaka afa dua tsen ho

dε: Ana hom nnhu mbrε Nyankopɔn dze asem papa ye mfatoho. Ɖtse dε dua papa, ne ntsin no tsintsim na ne abaw no du sor. Oyi n'aba mber nyinara ɔnam n'Ewuradze tum ntsi... (14:25-26). Allah dze dua papa bi ayε kasa ndanenyi bi dε ogyina hɔ ma gyedzi a odzi mu na ne ntsin ye dzen na n'abaw du sor na ɔnam n'Ewuradze Ne mbranssem do sow aba mber nyinara. ....ne ntsin no tsinstim.... Kyere dε ne gyedzi ho nhyehyεε wɔdε ɔye dzen na ɔye nokwar so na ɔnye gyedzi mapa kɔ do a ɔsow aba aber nyinara. Onnyi dε ɔye dε dua wui. Hwe na ka dε yetse dem tsebea yi mu siesiara anaa?

Nkorɔfo pii ka dε gyedzi no ho hia nye den? Ɖbeyε den beyε dε ɔyarfo kwasea beka dε oduyεfo no ho hia nye den? Sε ɔdwen dε onnhia oduyεfo na no ho nnhia no a eben nsunsuado na ne yarba no dze beba? Siesiara dze Muslimfo, dε mbrε ɔtse noara, agye Islam ato mu na mbom wonnyi nokwar gyedzi tsebea mu. Sε sunsum mu kandzea nye gyedzi kɔ do a nna odzi mu. Sε yetwa no tsia a, dem nsem yi ho ntsi na m'aba. Dem ntsi, mma mmpe ntsem mmbɔ me sombo dε meye ɔtorfo. Mbom, suro Otumfo Nyankopɔn na nu woho osiandε hɔn a wonu hɔnho no ye enyansafo. Yardom ho nsenkyeredze no ye mbusu mapa na Otumfo Nyankopɔn eyi akyerε me wɔ ho: '...ampaara, Nyankopɔn nsesa nkorɔfo hɔn gyinabew gyedε hɔnara sesa dza ɔwɔ hɔn akoma mu no' (13:12). Iyi nye Otumfo Nyankopɔn N'asem na ndom nka nyia ɔkasa tsia Otumfo Nyankopɔn. Otumfo Nyankopɔn aka dε Ne pε sesa wɔ ber a akoma asesa. Dem ntsi suro Otumfo Nyankopɔn na bɔ hu wɔ N'ebufuwhyew ho. Obi nnkotum agye obi n'adzesoadze. Nkorɔfo pii nntum nndzi nokwar wɔ nsem a ɔwɔ asendzibea ho; dem a nna eben su na ehwe a wɔbekyerε wɔ Ndaambankwa a wɔaka afa ho dε 'Da no a obi boguan efi no nua nkyen (80:35). Wɔkyerε ase fii Malfuzat Vol.8 Pg. 261-262.

Anohoba Messiah (ANN) ka dε: Dε mbrε obi ka dε ɔgye Allah na Nkɔnhyenyi dzi naaso sε onndzi mbranssem a wɔaka no do a, biribi tse dε asɔryε, akɔnkyen, Hajj nye Zakat, Nyamesuro na ahotsewee na obedzi mbranssem a otum tsew nyinpa ho, na obeyi bɔn akwa na ɔbeyε papa nye dza ɔkeka ho. Sε obi annye dem a wɔfrε no Muslimnyi a ɔnnye yie na yenntum so nka dε ɔwɔ tsenenee afadze. Demara so na sε obi angye Anohoba Messiah (ANN) no enndzi a, anaaso woennhu hia a ohia dε ɔgye Anohoba Messiah (ANN) no to mu a, nna woennhu Islam no bo a ɔsom, na woennhu Nkɔnhyenyi so no bo a ɔsom. Dem nyimpa yi so yεfrε no Muslimnyi nokwarfo a ɔnnye yie na wɔannye setsie ama Nyankopɔn na N'asomafo. Dε mbrε Allah nam Kɔnhyenyi do ahyε mbra wɔ Kuran mu no, demara so na Khalifa a ɔbeba wɔ ewie ber no, noho nkɔnhyε wɔ Kuran mu. Nkorɔfo a wɔanngye no enndzi na wobetsia no no, wɔafre hɔn etsirmɔdzenfo. Soronko a ɔda Kuran mu nsem na Hadith mu nsem mu no, (ɔnnye soronko na mbom ɔye asem nkyeremu a ɔrekyerε Kuran nsem mu) ɔnye dε Kuran abɔ Khalifa no dzin na Hadith so afre dem Khalifa kor no ara Anohoba Messiah. Muslimnyi papa ben na ɔbeka dε obi a Kuran ahyε noho nkɔm na ɔnam do ma ɔmaa nyimpa no mbae ho hia no, onnhia dε ɔbegye no ato mu (Wɔkyerε ase fii Malfuzat Vol.8 Pg. 261-262).

O! hom nkwasεafo, ebenadze na medze hom bɔtoto ho, hom gyinabew tse dε nkorɔfo tsibɔnfo bi a, obi ayε ture fεefew a nduadzewa ahorow pii wɔ mu na esutsen repem ase a ɔben hɔn fie na ndua a owin wɔ ase na ɔyemuyiefo yi ato nsa afre hɔn wɔ aber a wɔtse ewia

mu na ohyew dze hon na wonnya owin biara, na wonnyi nduadzewa biara so nndzi na wonnyi nsu a wobonom. Na hwe de dem tsibonfo yi apow nsa a oyemuyiefo yi towee frɛ hon no. Na onam do na okom na nsukom ekumkum hon. Dem ntsi Nyankopon reka de Odze nkorofɔ fofor a wobetsena owin no ase wobedzi nduadzewa no na wobonom nsu deedew no. Nyankopon dze aye mfatoho de Dhul-Qarnain kotoo nkorofɔ bi a nna worehyew wo ewia mu na dem nkorofɔ yi ammpɛ de Dhul-Qarnain beboa hon, dem ntsi wokoor ahokyer mu pii. Na Dhul-Qarnain san kotoo nkorofɔ bi so a wobisa no mboa tsia hon atamfo. Osii ban dze twitwaa gyee hon fii atamfo nsa mu.

Meka no wo nokwar mu de emi nye dem Dhul-Qarnain no a Kuran aka no ho asem no a obotoo amanaman hon mfenhyia oha no. na nkorofɔ a worehyew wo ewia mu nye Muslimfo no a woanngye me anto mu no. Kristianfo no gynabew tse de obi a otse mprotɔɔ mu na ommma n'enyiwa do nnhwe ewia mpo. Na nkorofɔ a wogyee ban maa hon nye akadofɔ a wogyee me edzi no. Meka no wo nokwar mu de woyinom nye nkorofɔ a hon gyedzi begye hon nkwa efi hon atamfo nsa mu no. fapem biara a onnye dzen no, hon a woye mbataho (Shirk) anaa wonngye Nyame nndzi no bese no. Mbom, me Kuw yi betsena ase mber tsentsen ana Satan ronntum nndzi hon do kunyim na onnkotum afa hon ndomum. Hon nsem mpensampensamu nye hon adwen na kyere ano beye ndam asen nkrantsee na obowo asen pia na woboko do edzi kunyim wo asor nyinara akopem atsembuada.

Oho! Hwe nkweisefo no a woenntum annhye me nsew no, hom nhwe sum kabii a wowo mu na woennya enyiwa ennhu nokwar kandzea no. Woenntum ennhu me osiande adwen bon afura hon enyiwa. Na hon akoma awe nkandar na hon enyiwa afura. Se nkye wotu anamon dze rokohwehwe nokwar na wotsew hon akoma mu efi wontwiwontwi ho a, wofa akonkyen wo adzekyee na woye asor anafua, su frɛ Nyankopon a, nkye Oyemuyiefo Nyankopon no beyi me bobew akyerɛ hon. Dza ohia nye nkye wobosuro Nyame, Ono a Obor ehia dze nyinara do no (Wokyerɛ ase fii Brahin e Ahmadiyya Part V, Ruhani Khaza'in Vol. 21, pp. 313 – 315).

Anohoba Messiah (ANN) no san kyereew bio de: O! Adasamba, mma hom mmbu Nyankopon enyimtsia nye Ne nsenkyeredze na hom nsre bonfakye wo hom bon ho mfi Nyankopon ho, na woakyerɛ ahobrase wo N'enyim wo hon bon ntsi. Ana hom were efi hon a wodzii hom enyim kan a wobuu asomafo no atorfo no dza hon ewie yee. Se hom wo suro bi a hom nhwehwe sumabew mfi Nyankopon ho mfi dza hom adwen mu nntsew hom wo ho no. hom nsor nkorkor na hom nnyi hon a woye enyitan no akwa na hom ndwen de se nkye etsiafo a woedzi hom enyim kan no ana nsenkyeredze ammba hon nkyen? Ana hom nnye famfamfo wode hom buu Nyankopon enyimtsia? Hwe Nyankopon Odomfo Nokwarfo No annhye me enyimyam, na Wɔannhye me nokwardzi ma, na Wɔamma me mbasantsen na Wɔannsee m'atamfo? Na onam kasa na ndzeyee do akyerɛ nsenkyeredze akyerɛ hon a wowo enyiwa a wodze hu Nyame Kokroko No a Odze ewia a akyer bosom na bosom so a akyer ewia wo Ramadhan bosom kor no mu aye nsenkyeredze akyerɛ hom.

O! Adasamba me fi Nyankopon Otumfo no ho na m'aba hom nkyen. Ana hom mu bi wo ho a osuro Osorsor Hen Kokroko No anaa hom botwa mu ako wo enyimbungudo mu.

Hom dze hom apam edur ekyir na hom dze mber tsentsen aye hom nhyehyee mber tsentsen tse de obɔfo. Ebenadze na hom nnyae kwetsir nkogu na ebenadze na hom rohwehwe a hom nyae kwetsir de hom sɛɛɛ hom gyedzi. Dem ntsi Muslimfo, hom nsuro Nyankopɔn. Ana hom nnhu de mbre Nyankopɔn esi ahye m'asem ma na Wɔama me bonfakye mbordo. Ebenadze ye hom ma hom ntwahom enyi nhye Nyankopɔn Ne nsenkyeredze yi? Na hom hyehye me ahoroba yi, ana hom nnhu de dza hom dwenee no aye nkontompo, na hom nsusuii so aye kwa. Mma hom mmbɔ hom tsir mu nka dza onnyi mu wɔ aber a wɔrosɔ hom ahwe yi na hom ntow hom tegyirama mu. Se hom ye atseneneefo a, hom nya nuho de obi a noho abow no na osuro de obenya ewie bɔn. Nyankopɔn do hon a wonya nuho (Wɔkyerɛɛ ase fii Hujjatullah, Ruhani Khaza'in Vol. 12, pp. 192 – 193).

Hadhrat Khalifatul Masih bɔɔ mpaa de Nyankopɔn bobuei Muslimfo hon akoma mu ama woetum atse Nyankopɔn Ne nhyehyee ase ama woenya banbɔ efi ohaw nye ahomtsew ber a wɔwɔ mu siesieara yi. Ma wohu Odomankoma Ne nsenkyeredze a oye atowerenkyem ama wɔatwe honho efi etsirmɔdzen atseetsee a wɔdze retseetsee hen yi. Yesere de Nyankopɔn mma yenye atseneneefo na yenye nokwarfo wɔ hen kasaa nye hen ndzeyee mu ama yeetum abɔ adasamba kɔkɔ wɔ osɛɛ kɛse no ho.

Bio Hadhrat Khalifatul Masih kaa to gua de obeye funsie asɔr ama enuanom ebien bi; Chuadhry Mahfooz ur Rahman sahib a ofii mu wɔ 6<sup>th</sup> April, henara hen UK Sadr Ansarullah Chaudhry Waseem sahib ye ne ba. Qaisera Begum Sahiba so fii mu wɔ 13<sup>th</sup> April, odzii mfe eduosoon (70). Oye Hadhrat Khalifatul Masih II ne asew basia. Na oye obi a owo enyidze na onye Khalifat wɔ Nkitahodzi a no mu ye dzen. Na oboa abɔbɔfo nye hon a woye ehiafo no. Nyankopɔn nkrɔn hon gyinabew.

Translated by: 1. Mr. Alhassan Kobina Atta-Wenchie  
(Tutor in English Language, Jamiatul Mubashireen, Ghana)  
2. Maulvi Alhassan Bashir Annan Sahib  
(Tutor, Jamiatul Mubashireen, Ghana)  
3. Rasheed Possible Essuman Sahib  
(First Year Student, Jamiatul Mubashireen, Ghana)

Downloaded from: [www.jamiatulmubashireen.org](http://www.jamiatulmubashireen.org)  
Contact: [www.jamiatulmubashireen.org/contact-us](http://www.jamiatulmubashireen.org/contact-us)